

Na osnovu člana 12. Pravilnika o polaganju ispita na Univerzitetu u Bihaću br.: 06-4344/10 od 30.12.2010. god., Nastavno-naučno vijeće Tehničkog fakulteta Univerziteta u Bihaću na četrnaestoj redovnoj sjednici održanoj 28.03.2011.godine donijelo je

PRAVILNIK O POLAGANJU ISPITA (I ciklus)
na Tehničkom fakultetu Univerziteta u Bihaću za
studente koji studiraju u skladu sa Bolonjskim procesom

Član 1.

Ovim pravilnikom bliže se uređuje postupak ispitivanja i ocjenjivanja, rokovi i termini polaganja ispita za prvi ciklus studija koji vodi do zvanja završenog dodiplomskog studija (the degree of Bachelor) ili ekvivalenta (u daljem tekstu: dodiplomski studij) na Tehničkom fakultetu Univerziteta u Bihaću (u daljem tekstu: Tehnički fakultet). Dodiplomski studij za sticanje diplome traje tri godine, a vrednuje se sa 180 ECTS studijskih bodova (ECTS studijski bodovi odgovaraju kriterijima Evropskog sistema prijenosa kredita - European Credit Transfer System - ECTS).

Član 2.

Uspjeh studenata na ispitu i drugim provjerama znanja, vrednuje se i ocjenjuje sistemom uporedivim sa ECTS sistemom kako slijedi:

- a) 10 (A) - (izuzetan uspjeh sa neznatnim greškama), nosi 95-100 osvojenih bodova,
- b) 9 (B) - (iznad prosjeka, sa ponekom greškom), nosi 85-94 osvojenih bodova,
- c) 8 (C) - (prosječan, sa primjetnim greškama), nosi 75-84 osvojenih bodova,
- d) 7 (D) - (općenito dobar, ali sa značajnijim nedostacima), nosi 65-74 osvojenih bodova,
- e) 6 (E) - (zadovoljava minimalne kriterije), nosi 60-64 osvojenih bodova,
- f) 5 (F, FX) - (ne zadovoljava, potrebno je znatno više rada), ispod 60 osvojenih bodova.

U slučaju da nijedan student ne postigne 95 bodova, što predstavlja minimum za ocjenu 10, skala iz prethodnog stava može se korigirati prema najboljem postignutom uspjehu na prvom ispitnom roku.

Član 3.

Rad studenata se prati i ocjenjuje kontinuirano u toku jednog semestra, a ocjenjivanje se vrši dodjeljivanjem bodova za svaki oblik aktivnosti i provjere znanja u toku semestra i na završnom ispitu, na kojem se utvrđuje konačna ocjena.

U strukturi ukupnog broja bodova, koja mora biti opisana u planu rada za dati predmet, najmanje 50% bodova mora biti predviđeno za aktivnosti i provjere znanja u toku semestra. Završni ispit se u strukturi ocjenjivanja može vrednovati sa najviše 50% bodova.

Član 4.

Fakultet je obavezan u svakom semestru organizirati za vanredene studente nastavu „u učionici“ po pravilu prve, osme i petnaeste sedmice svakog semestra, a što se detaljnije regulira pravilima studija.

Vanredeni studenti obavezni su prisustvovati oblicima provjere znanja kako je predviđeno silabusima predmeta na Tehničkom fakultetu, a što se detaljnije regulira pravilima studija.

Vanredni studenti mogu polagati ispite s redovnim studentima.

Na godinama gdje je upisano manje od deset vanrednih studenata nastava se može održati konsultativno u dogovoru s predmetnim nastavnikom.

Član 5.

Oblici provjere znanja mogu biti pismeni, usmeni i praktični. Provjera znanja je po pravilu pismena, a vrši putem testa ili pismenog rada. Način ispitivanja određuje matična katedra ili predmetni nastavnik, a svi oblici provjere znanja su javni.

Pismena ili praktična provjera znanja iz jednog nastavnog predmeta ne može trajati kraće od 1 (jedan) niti duže od 3 (tri) sata. Pismeni radovi sa pismenih ispita čuvaju se do 1. novembra slijedeće akademske godine.

Član 6.

Studij I ciklusa (dodiplomski studij) se završava polaganjem svih ispita i/ili izradom i odbranom završnog rada u skladu sa studijskim programom.

Član 7.

Završni ispit se obavlja u drugoj sedmici nakon završene nastave. Studenti koji ne polože završni ispit (ne zadovolje) u regularnom (redovnom) roku mogu polagati popravni ispit iz predmeta koji nisu položili na kraju jednog semestra. Između regularnog (prvog) i popravnog ispitnog roka ostavlja se vremenski period od 2 (dvije) do 4 (četiri) sedmice u kojem će nastavnici i saradnici konsultacijama, a po potrebi i dopunskom nastavom pomoći studentima da se pripreme za popravni ispit.

Član 8.

Student može prenijeti u narednu godinu studija najviše 6 (šest) neostvarenih ECTS bodova, odnosno najviše jedan nastavni predmet ukoliko je isti vrednovan sa više od 6 (šest) ECTS bodova.

Prilikom svakog ponovnog upisa predmeta (student koji obnavlja studijsku godinu) student je dužan uplatiti odgovarajuću naknadu čiju visinu, svojom odlukom, utvrđuje Senat Univerziteta.

Član 9.

Student koji nije zadovoljan postignutom ocjenom, odnosno student koji nakon prvog pokušaja ne položi ispit iz određenog predmeta, može u roku od 24 sata nakon saopštenja ocjene pismeno zatražiti da se ispit ponovi pred komisijom. Zahtjev za ponavljanje ispita mora biti argumentovano obrazložen.

Dekan imenuje predsjednika i dva člana komisije u roku od 24 sata od prijema zahtjeva, ako ocijeni da je zahtjev opravdan, s tim da jedan član komisije mora biti iz drugog nastavnog predmeta, a ispitivač s čijom ocjenom student nije bio zadovoljan ne može biti predsjednik komisije. Dekan određuje vrijeme polaganja ispita u roku od tri dana nakon podnošenja zahtjeva studenta.

Pismeni dio ispita neće se ponoviti pred komisijom, već će ga komisija ponovno ocijeniti, kao i sve radove koje je student radio u toku nastave i vježbi.

Komisija može donijeti ocjenu, kako je predviđeno programom predmeta, na bazi samo pismenog ispita i rada u toku nastave i vježbi ili obaviti i usmeni dio ispita, a odluku donosi većinom glasova. Odluka komisije je konačna za taj ispitni rok.

Student može tražiti po jedan komisijski ispit iz najviše dva predmeta u toku jednog semestra.

Član 10.

Rokovi i termini polaganja ispita za dodiplomski studij (I ciklus) na Tehničkom fakultetu Univerziteta u Bihaću, u toku akademske godine, su:

Zimski semestar

Ispitivanje i ocjenjivanje se vrši dodjeljivanjem ECTS bodova za svaki oblik aktivnosti i provjere znanja u toku trajanja semestra	od 1. do 15. sedmice u zimskom semestru
Završni ispit za predmete zimskog semestra	17. sedmica u zimskom semestru (januarski termin)
Dopunska nastava i popravni ispiti	od 18. do 20. sedmice u zimskom semestru (februarski termin)

Ljetni semestar

Ispitivanje i ocjenjivanje se vrši dodjeljivanjem ECTS bodova za svaki oblik aktivnosti i provjere znanja u toku trajanja semestra	od 1. do 15. sedmice u ljetnom semestru
Završni ispit za predmete ljetnog semestra i popravni ispiti za predmete zimskog semestra	17. sedmica u ljetnom semestru (junski termin)
Dopunska nastava i popravni ispiti	od 18. do 20. sedmice u ljetnom semestru (julski termin)

Član 11.

Fakultet organizira dva dodatna popravna ispita za sve predmete zimskog i ljetnog semestra u septembru i to u prvoj polovini prvi termin, a drugi termin u drugoj polovini septembra.

Član 12.

Studenti koji ne polože i prenesu neki predmet u narednu godinu (koji uslovno upišu višu godinu studija) imaju pravo polaganja tog predmeta u svakom terminu (januar, februar, juni, juli, septembar), ako su ispunili uslov za izlazak na ispit.

Studenti koji su upisali uslovno godinu studija mogu osvajati bodove na predmetima u tekućoj akademskoj godini (kao i studenti koji su položili sve predmete iz prethodne godine studija) kako je predviđeno za aktivnosti i provjere znanja u toku semestra.

Studenti nemaju pravo polagati završni ispit predmeta koje slušaju u tekućoj akademskoj godini sve dok ne polože predmet koji su prenijeli iz prethodne godine studija.

Član 13.

Studenti koji ponavljaju godinu studija imaju pravo polaganja predmeta, ako su ispunili uslov za izlazak na ispit, u svakom terminu (januar, februar, juni, juli, septembar).

Član 14.

Student završne godine studija, koji je ovjerio posljednji semestar (apsolvent) zadržava status studenta još 6 (šest) mjeseci, odnosno do 31. marta naredne godine, u kojem periodu ima pravo na obavljanje preostalih završnih ispita, u svakom kalendarskom mjesecu.

Član 15.

Tehnički fakultet može organizirati popravne ispite za predmete koji su vezani odnosno kada je uslovljeno polaganje predmeta iz zimskog semestra da bi se pristupilo polaganju predmeta iz ljetnog semestra.

Član 16.

Vanredni studenti koji polažu razliku predmeta (III godinu studija) imaju pravo polagati ispite u svakom kalendarskom mjesecu.

Član 17.

Ovaj pravilnik se primjenjuje za sve studente koji studiraju u skladu sa Bolonjskim procesom i koji su upisani na svim studijskim godinama Tehničkog fakulteta u Bihaću.

Član 18.

Pravilnik stupa na snagu narednog dana od dana objavljivanja na oglasnoj tabli Tehničkog fakulteta.

Bihać, 28.03.2011.god.
Broj:01-465-1

Predsjednik NNV
Tehničkog fakulteta Univerziteta u Bihaću

Doc. dr. Atif Hodžić